

Paesi d'Oghje

A mio casuccia à mezu à tant'altre listesse
In issu paese novu induve sò venutu à stà
Ogni ghjornu disceta l'amarezza d'un esse
Vicinu à quelli chì m'anu vistu ingrandà

A vita qualchì volta face attempà le brame
È à ciò chì ci impreme un si pò dì di sì
U bisognu vi piglia tutte quell'ore calme
Lascia solu un ricordu chì v'aiuta à stà qui

Ci aghju solu in cumunu cù quelli chì aghju accantu
Issu muru chì trameza per un pudè passà
È puru s'ellu hè chjucu pare cusì tamantu
Mez'à tanta paura pè sparte cumu fà ?

Forse anu anch'elli in core qualchì locu lasciatu
Chì stentata a vita i viderà vultà
È ghjè solu in l'attesa di issu ghjornu speratu
Chì soli mez'à tutti elli ponu campà

Da qui à induve sò natu un ci hè mancu un'oretta
Ma mi si pare d'esse pè qualchì centinente
Induve hè a ricciata è induve hè a stretta ?
Un ci hè mancu una piazza per esse à mezu à a ghjente

Cumu fà per truvà di pettu à l'addisperu
Daretu à issi purtoni un amicu, un amore
Tuttu ciò chì ci stringhje quandu lu core hè neru
Si ne và cù issi lochi senza nisun' rimore

Certi anu vistu qui u so sognu felice
Chì ne serà dumane di issu novu campà
Quandu a vita ghjunghje di a fine à l'orice
È chì nimu un s'affacca dicendu « cumu và ? »

Centu casi vicinu un sò micca un paese

Sì quand'ellu si more più nimu ùn la sà
Cumu falli una storia à mezu à tante offese
À issu paese novu induve sò venutu à stà
Cumu falli una storia à mezu à tante offese
In issu paese novu more l'umanità.